



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXV La vie de saint Zenobe Archevesque de Florence, Confesseur.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

l'Eglise, quand les fidelles les ont offerts à Dieu, en témoignage de leur pieté & deuotion, & reconnoissant que ce que les hommes ont de plus precieux doit seruir au Seigneur de tout ce qui est créé, qu'il a donné, & auquel il appartient. Le saint Pape Urbain vescu en la Chaire saint Pierre six ans, sept mois & quatre iours, & apres auoir beaucoup trauaillé & souffert pour l'Eglise de nostre Seigneur, le Prefait Almache le fit prendre, foïetter avec des cordes plombées, & decapiter: & ficetter son corps, pour seruir de pasture aux bestes: Neantmoins vne sainte Dame nommée Marmenic, & sa fille Lucine le ramasserent, & l'enterrerent dans le cimetiére de Pretextat en la rue Appienne. Son martyre fut le vingt-cinquiésme May, l'an de nostre Seigneur 233. le 10. de l'Empire d'Alexandre Seuer: car encore que cét Empereur ne fust pas ennemy des Chrestiens, & qu'il n'eust esneu aucune persecution contre l'Eglise, au contraire il auoit l'image de nostre Redempteur Iesus-Christ en son Oratoire, parmi celles de ses dieux, neantmoins aucuns de ses Ministres desquels il se foit grandemét, estoient ennemis iurez de Iesus-Christ, & de sa Croix, & taschoient de destraciner & extirper la Religion Chrestienne. Urbain tint cinq fois les Ordres au mois de Decembre, esquelles il fit neuf Prestres & cinq Diacres, & huit Euesques. Saint Damase fait mention de saint Urbain, & les Auteurs des vies des Papes. Les Martyrologes Romains, de Beda, Vfuard, & Adon, & le Cardinal Baronius es Annotations du Martyrologe, & au second Tome de ses Annales, page 339.

LA VIE DE SAINT ZENOBE,
Archeuesque de Florence, Confesseur.

ZEN Archipreste d'Areze en Toscane, a escrit la vie de saint Zenobe, Archeuesque de Florence, homme tres-saint, & grand defendeur de la Religion Catholique contre les Ariens. Surius la rapporte en son 3. Tome, & saint Antonin aussi Archeuesque de Florence en fait mentiõ en la secõde partie de son Histoire, titre 10. chapitre 12. Saint Zenobe naquit à Florence l'an de nostre Seigneur trois cents trente-cinq, d'une noble famille, encore qu'elle fust Payenne: son pere auoit nom Lucian, & sa mere Sophie: dès son enfance il s'appliqua à la vertu, & estoit fort honteux, timide, & si modeste, qu'on ne le veid iamais rire à gorge desployée. Il estudia aux bonnes lettres, & s'y rendit scauant, tant par son bel esprit, qu'à cause du soïn & de la diligence qu'il y apportoit. Ayant atteint l'age de vingt ans, ses parens traiterent de le marier avec vne belle & riche Damoiselle, digne d'un tel mary. Mais luy qui desiroit seruir nostre Seigneur en un estat plus parfait, & luy cõsacrer la pureté de son ame, pria Theodore (qui estoit lors euesque de Florence) de le prendre en sa protection, & le deliurer

de ceste seruitude & perplexité: ce que l'Euesque fit volontiers, dont ses parens cruellement irrités vindrent à main armée, assistés de tous leurs amis, pour terminer ce differét avec l'Euesque, lequel esclaire de la lumiere celeste, & embrasé de l'amour diuin, leur dit tant de belles raisons, qu'il les apaisa, & leur persuada de quitter les erreurs des Gentils, & receuoir le saint Baptesme, comme auoit fait leur fils. Zenobe ne se contenta pas de ceste victoire, car il voulut triõpher aussi du monde, mesprisant ses vanitez & folies, pour s'adonner entierement au seruice de Dieu: pour cét effect il print les Ordres sacrez, & fut fait Chanoine, puis apres Archidiaque de l'Eglise Cathedrale, & deuint vn miroier de vertu, & vn exemple de sainteté. Il prioit sans cesse, il estoit charitable & liberal aux pauures, magnanime & constant Predicateur contre les Heretiques. Saint Ambroise allant à Rome, passa enuiron ce temps par Florence, où ayant recogneu les grandes parties de la sainteté & doctrine de Zenobe, il fit vne estroite amitié avec luy, & estât à Rome il aduertit le Pape Damase des qualltez de Zenobe, si bien qu'il fut mandé, & créé Diacre de l'Eglise Romaine, avec commandement de resider à Rome. Vn iour qu'il accompagnoit Damase à l'Eglise de nostre Dame, qui est au delà du Tybre, on luy amena vn enfant du Prefet de la ville qui estoit paralytique, Zenobe par son oraison le guarit. Depuis s'estant offert à Damase certaines affaires Ecclesiastiques d'importance, il enuoya Zenobe à Constantinople pour les negotier avec l'Empereur, dont il s'acquitta avec vne merueilleuse prudence & diligence, confondant les heretiques qui estoient en grand nombre, consolant & encourageant les Catholiques, d'autant qu'il confirmeroit sa doctrine par ses miracles, & en outre il chassa les diables des corps de deux hommes qu'ils possedoient estrangement.

Zenobe apres auoir depeché ses affaires, retourna de Constantinople à Rome, où il fut fort bien receu de Damase, lequel ayât sceu qu'à l'occasion du decez de l'Archeuesque Theodore, la ville estoit diuisée, les Heretiques voulans auoir vn successeur qui fust de leur secte, & les Catholiques s'y opposans, il enuoya Zenobe à Florence pour le pacifier, lequel fut receu de tous ceux de la ville, & par vne inspiration diuine les Catholiques & heretiques resolurēt qu'il n'y auroit point d'autre Euesque que Zenobe: luy qui estoit humble s'en retourna promptement à Rome, & dit au Pape qu'il n'auoit rien sceu gagner sur les Florentins: mais sur ces entrefaites, il arriva deux deputés de Florence, pour supplier sa sainteté de leur donner Zenobe, pource qu'ils ne receuroient d'autre Euesque que luy. Le Pape, quoy qu'il eust beaucoup de regret d'esloigner Zenobe d'aupres de soy, duquel il receuoit tant de bõs seruices, neantmoins estant vaincu par les importunités de ces Ambassadeurs qui luy en faisoient de grandes instances, il s'y accorda, & commanda à Zenobe d'accepter l'Euesché, de maniere qu'il le sacra, quelque repugnance qu'il peust faire, & le constitua chef & metropolitain des Eues-

ques de Toscane, Zenobe estant en l'age de 21. an. A son depart de Rome, Damase en signe d'amitié, luy donna les corps des Martyrs, Abdon & Senen, lesquels il mit sous le grand Autel de l'Eglise saint Sauueur.

Saint Zenobe fut receu de ceux de Florence, avec tant de resioyissance qu'ils firent des festes, dequoy il estoit leur Euesque: mais tant plus ils se resioyissoient d'auoir vn tel Pasteur, tant plus il s'en affligeoit, considerant les grandes obligatiōs qu'il auoit de repaistre ce troupeau; & craignant qu'il ne se perdist par sa faute, il s'adonna dauantage à l'oraison, suppliāt nostre Seigneur, qui luy auoit imposé la charge de luy donner les forces de la supporter. Il ieusnoit & veilloit beaucoup, il mattoit sa chair, avec tant de rudes cilices, & autres penitences austeres. Il taschoit d'esclairer les heretiques par ses conseils, leçons, disputes, & sermons, & les attirer au chemin de salut. Quant à son reuenu, il ne prenoit que ce qu'il luy en falloit pour luy & ses gens, & donnoit le surplus aux pauvres. Par ceste vie, doctrine & vigilance, accompagnée de plusieurs grāds miracles que Dieu opera par luy, il deuint vn nouveau Soleil du monde. L'vn de ses miracles fut qu'une femme veufue Payenne, noble & riche, auoit mignardement esleue deux de ses enfans. Vn iour s'estans irritez contre-elle, pour quelque leger suiet, ils la battirent, & outragerent cruellement (ce fut peut-estre vne punition diuine, dequoy elle les auoit si delicatement nourris) la triste mere, furieuse & enragée, se voyant portée par terre, commēça avec des cris horribles à inuocuer toutes les furies infernales, & leur demander vengeance de ses enfans. Dieu permit (encore que ceste femme & ses enfans fussent idolatres, & par conséquent, que sa malediction maternelle ne deust pas auoir tant d'effect) qu'ils furent possedez des diables, pour leur apprendre l'obeyssance que doiuent les enfans à leurs parens, combien ils doiuent redouter leur malediction. Les enfans de ceste pauvre mere demoniacle, se mordoient & deschiroient la peau comme des chiens enragez: on les lia & enchaina, encore n'en pouuoit-on venir à bout. Quand ceste miserable femme vid ses enfans reduits en si piteux estat par sa malediction, elle fut plus en peine qu'auparuant; l'amour maternel ayant vaincu son iuste courroux, & ne sçachant point d'autre remede, elle presenta ses enfans à Zenobe, le suppliant humblement de les guarir: ce qu'il fit, apres auoir demeuré deux heures en oraison: depuis leur mere & eux, avec leur famille, se firent Chrestiens, & perseuererent en la vertu.

Vne Dame Françoisē qui alloit par deuotion à Rome passa par Florence, afin de voir Zenobe, duquel on racontoit tant de merueilles, elle luy laissa vn siē fils, qui s'estoit trouuē mal par les chemis, en intention de le prendre au retour, l'enfant mourut à Florence, auant que sa mere eust achenē son voyage.

Quand elle fut venuē, & qu'on luy eut dit que son fils estoit mort, elle fit prendre son corps, & porter aux pieds du saint Euesque, le suppliant

avec vne grande Foy les larmes aux yeux, de le rendre son fils qu'elle luy auoit laissé en garde, & comme en depost, d'autant qu'elle ne pouuoit courner en France sans luy Zenobe meue de compassion se mit en prieres, & fit le signe de la Croix sur l'enfant, qui ressuscita, lequel il rendit vif à sa mere, qui en fut rauie de ioye & d'admiration.

Vne autrefois allant visiter vne Eglise avec ses suffragans, il rencontra par le chemin les funerales d'vn ieune Gentil-homme, desquelles il tascha des'esarter, mais il fut tellement pressé & importuné de tous ceux du conuoy, de resusciter ce mort qu'il ne s'en peut excuser.

Il ressuscita aussi vn mort de cinq ans, que des bœufs eschauffez qui trausnoient vne charette, auoient renuersé & mis en pieces: & encore vn autre qui estoit mort sans confession commandant à vn de ses Diacres, nommé Eugene, homme de sainte vie, de se leuer du lict où il estoit malade, & d'arrouser le corps de ce mort avec de l'eau beniste qu'il luy enuoya, & de le luy ramener en vie, ce que fit Eugene, lequel se recourut coucher, & mourut de ceste maladie.

Toutes ces resurrections de morts furent miraculeuses & admirables: mais i'en diray encore vne, qui ne l'estoit pas moins. Allant par les Alpes consacrer vne Eglise il rencontra des gens de saint Ambroise, qui luy apportoiēt de la part vn beau present de Reliques des Martyrs, Vital, Agricole, Nazare, Celse, Gervais & Protas, lesquels estoient tous affligez, d'autāt que le principal d'entr'eux, nommé Simplicie, auoit trebuché avec sa monture du haut d'vn precipice iusqu'en bas, où il estoit mort, & esçalē. S. Zenobe mit aussi tost pied à terre, & baissa deuotement les reliques, puis ayant compassion de ces gens desolez, il fit oraison pour le defunct; & ne se leua point de terre, que le mort n'eust ressuscité: lequel il rendit vif & sain à ses compagnons, ain qu'ils retournassent tous ioyeux & contents vers S. Ambroise qui les auoit enuoyez.

Tous ces morts resusciterent par les prieres de saint Zenobe, qui fit plusieurs autres miracles. Il guarit vn vieil aueugle, qui demandoit l'aumosne à la porte de l'Eglise, lequel estoit Payen, mais il se rendit Chrestien, & se dedica au seruice de Dieu le reste de ses iours avec sa mere, & vne sienne sœur.

Zenobe florissoit par ces miracles & autres semblables; respandant par tout vne douce odeur de foy: il estoit honoré des bons, & respecté des meschans, croissant de iour en iour en sainteté. Ses parens decederent, & luy laisserent de grands biens, desquels il distribua vne partie aux pauvres, & du reste, il en fonda vn Monastere près de Florence, où les Religieux, viuans sous la closture & obediēce, peussent seruir plus librement à Dieu. En fin estant comblé de vertus, de travaux, de merites & d'age, il tomba malade: & recogneut que le iour de son decez s'approchoit dont il aduertit ceux de son Clergé, lesquels avāt diuulgé cela, vne indicible multitude de peuple accourut pour voir sa face, & recevoir la benediction de leur Pasteur, lequel, en les benissant,

les exhorta à la crainte & amour de Dieu, priant les Euesques qui estoient là presens, de faire le signe de la Croix sur luy, & regardant soigneusement la mort, rendit l'esprit à Dieu le 25. de May, l'an quatre cents vingt-quatre, aagé d'environ 90. ans, sous l'Empire d'Honoré, & Theodore le Jeune son neveu. Voila ce qui estoit contenu dans la vie de saint Zenobe, que Surius rapporte en son troisieme Tome. Mais il y a erreur au date des années, parce qu'il est porté au mesme lieu que saint Zenobe mourut le huitiesme an du Pontificat d'Innocent I. lequel fut fait Pape l'an 402. de maniere, que sa mort ne peut estre l'an 424. parce qu'il gouverna quinze ans, & mourut selon le Cardinal Baronius l'an 417. il fut inhumé par les Euesques, assistez de tout le Clergé, & du peuple dans l'Eglise Ambrosienne, ainsi qu'il auoit ordonné, encore que depuis l'Euesque André son successeur le transféra solennellement dans la grande Eglise, en laquelle translation, il aduint deux choses merueilleuses; la premiere fut, que comme les Euesques portoient le cercueil, ils furent accablez d'une telle multitude de peuple, qui vouloit voir & toucher ce corps saint, qu'on le renuersa contre vn vieil ormeau sec, qui estoit au milieu de la place, lequel reuerdit aussi tost que le corps saint l'eut touché; l'autre fut, que ne pouans entrer dans l'Eglise avec la biere, parce qu'il sembloit qu'y ne vertu celeste retenoit ceux qui le portoient, l'Euesque prosterna en terre les yeux leuez au Ciel, supplia nostre Seigneur à chaudes larmes, de ne point attrister ce peuple, & fit vœu de fonder dans l'Eglise douze Chapellains, qui seruiroient continuellement saint, de façon que sa priere & son vœu furent exaucez.

Nostre Seigneur fit à ce peuple des misericordes indicibles en faueur de Zenobe, guarissant ceux qui venoient à son sepulchre attenez de diuerses maladies, & se recommandoient deuotement à luy. L'en rapporteray vn entr'autres, qui est fort notable. Vne mere auoit son enfant qui bultoit de soif, & de lardeur de la fièvre, ceste pauvre femme le veilloit la nuit, & il luy demandoit à boire à toute heure tellement qu'elle luy en donna quarante fois de suite, la mere desia ennuyée, & toute assoupie du sommeil, fut contrainte de se leuer pour luy bailler encore à boire. Lors elle luy dit tout hors de soy: Que tu puisses aualer le diable avec ceste eau. Le diable ne fut pas sourd, car Dieu permit qu'aussi tost (pour apprendre aux meres, combien elles doiuent estre retenues à donner de telles maledictions) il fut possédé & tourmenté cruellement, ainsi qu'il aduint aux deux autres enfans, qui auoient mal-traité leur mere, dont nous auons cy-dessus parlé. Ils ne trouuerent d'autre remede, sinon d'amener ce garçon au sepulchre de saint Zenobe, où il fut deliuré par ses prieres. Depuis le vingt-cinquiesme d'Avril l'an 1439. du temps d'Eugene IV. au Concile qui se celebra à Florence pour l'vniõ de l'Eglise Grecque & de la Latine, on fit vne autre translation plus solennelle du corps de S. Zenobe, & fut colloqué en vn lieu plus eminent & ho-

norable, par les Cardinaux, Patriarches, Prelats, Princes, Ambassadeurs, & Seigneurs, qui assistèrent à ce Concile vniuersel. Outre les Autheurs dont nous auons desia fait mention, qui parlent de saint Zenobe, il y a le Martyrologe Romain le vingt-cinquiesme May: le Cardinal Baronius en ses Annotations, & au quatriesme Tome de ses Annales, Paulin en la vie de saint Ambroise, & d'autres Autheurs modernes.

A Rome sur le grand chemin qu'on appelle à present Stradapia, deceda saint Urbain Pape & martyr, lequel gouverna l'Eglise apres Saint Calliste, & par ses belles & doctes exhortations, conuertit plusieurs personnes à la Foy, entre lesquels furent saint Tiburce & Valerian, qui furent depuis martyrs, & luy mesme ayant beaucoup endure pour la sainte Eglise, eut en fin la teste tranchée. A Dorostore ville de Mysie, que les Turcs appellent Buzia, moururent les Saints martyrs Pasicrates, Valention, & autres deux couronnez ensemble. A Milan se fait la feste de Saint Denis Euesque dudit lieu, banny pour la Foy Catholique par l'Empereur Constance Arrien, & enuoyé en Capadoce, où il mourut. Saint Basile Euesque de Cesarée enuoya les reliques dudit Saint à saint Ambroise, qui les recut avec l'honneur qu'elles meritoient. A Rome deceda Saint Boniface Pape IV. du nom, qui dedia la Ronde en l'honneur de nostre Dame, & de tous les autres martyrs. A Salerne Saint Gregoire Pape VII. du nom, qui succeda à Alexandre II. & defendit couragement la liberte de la sainte Eglise, contre l'arrogance & presumption des Princes & grands Seigneurs de son temps. A Florence Saint Zenobe Euesque dudit lieu, renommé pour sa sainteté, doctrine & miracles. En Angleterre Saint Aldelme Euesque de Schirebourg. Au Diocèse de Troyes en Champagne saint Leon Confesseur. A Assise ville d'Italie la translation du corps du glorieux saint Francois Confesseur, faite du temps du Pape Gregoire IX. de ce nom. A Verule pres de Rome fut faite la translation de sainte Marie mere de saint Jacques le Mineur, les reliques de laquelle font plusieurs miracles.

LA VIE DE SAINT ELEVTHERE, Pape & Martyr.



Vn iours apres la mort du saint Pape Sother, Eleuthere fut esleu en sa place, natif de nicopolis en la Grece, Diacre & disciple du saint Pape Anicet. L'Eglise iouyt en son temps de quelque tranquillité, laquelle avec le ba-

tailon inuincible de ses braues guerriers & glorieux Martyrs, auoit subiugué les cœurs de la plupart des Gentils, & la vie exemplaire, & doctrine celeste des saints Papes, accõpagnée de miracles que Dieu faisoit de tous costez, en tesmoignage de la verité de la Religio Chrestienne, auoit eu plus de force pour la plâter & estâdre par tout le monde, que la rage & fureur des tyrans n'auoit eu de pouuoit de l'opprimer & reuerfer: L'Eglise de nostre Seigneur se multiplioit merueilleusement durant ceste paix. A Rome plusieurs Seigneurs & Cheualiers, desia ennuyez de la superstition de leurs faux dieux, & de la cruauté abominable de leurs Empereurs, receuoient la lumiere de l'Euangile, & se conuertissoient à nostre Seigneur par la doctrine & predication du Saint Pape

26.
MAY.